

叅政兩人督其事詔信至遼東時巡撫都御史
已得請倉官吏卒盜糧石以上者處死又造新
斛視舊加二寸使人付信俾鉤考之信曰使彼
真盜雖斗殺之不卹若加斛以置之死地豈情
也哉命取舊斛曰以是入以是出雖朝廷有問
當以是對取諸新斛立碎而火之己亥改四川
分巡所至問民疾苦不憚險遠時提督兵備刑
部侍郎羅綺檄信總理松潘邊儲進攻大姓彝
寇破其黑虎三捷諸寨天順丁丑英廟復位信
奉表入賀留爲太僕卿當是時馬政久廢朋言

蜩興三營大將石亨孫鏜曹欽聯疏入言太僕
急徵諸衛馬非便請隸兵部從之信曰如此則
爲不得其職矣卽移文言太僕職專馬政而高
廟有旨馬數不許人知今自隸兵部使馬之增
耗太僕不得與聞脫有警而馬不給則孰任其
咎願明示爲著令兵部懼以爲言詔復其舊戊
寅陞都察院右僉都御史巡撫遼東先是用曹
石言罷天下巡撫官兵民皆不便英廟乃命學
士李賢尚書王翱舉堪任者得信及李秉白圭
王宇等一時號稱得人造戰車千輛以備攻守

朔義粟以備凶荒設月輪簿以革科歛置號牌
以察奸細號令一新庚辰調南京太僕少卿辛
巳召還陞刑部右侍郎治大獄務平恕屢飭諸
屬司毋觀望以出入人罪甲申丁母憂扶柩還
河間朝廷遣官諭祭營葬成化元年起復爲兵
部侍郎丁亥貴州蠻叛上用廷議進兵部尚書
提督軍務與襄城伯李瑾發川廣雲貴蕃漢兵
討之至永寧分大軍爲三道自督以入金鷺池
而分四川軍由戎縣貴州軍由芒部雲南軍由
普市入授以方畧期四路俱會大壩及李子關

渡船鋪賊恃險拒敵飛梭下礮如雨諸軍以神
銃勁努却之攀崖而上順風舉火焚其龍背豹
尾二寨賊退保大壩而貴州已接其後雲南軍
已攻其左右驚顧四散連破二十餘寨獲銅鼓
數十斬獲五千級生擒二千人餘賊復走入天
井水磨二洞洞竅幽暗不可入命諸軍以土石
窒其門圍守月餘賊盡死洞中又陰察九姓土
獠之附于賊者還師撲之不踰年都掌蠻悉平
捷聞賜敕獎諭復請移瀘州衛于渡船鋪以控
諸蠻分裂都掌故地隸永寧芒都易大壩爲太

平川立長官司以轄熟獫狁凱旋進兼大理寺卿
請者不許戊子十一月命入侍經筵辛卯上以
雨雪不降令羣臣條陳闕失信上言兵事可更
張者四尋改南京叅贊機務時應城伯孫繼先
在南京多不法會事覺未決有詔下叅贊府多
請賞之者信執筆憤然曰侯伯乃武臣領袖儼
一戒百正在于此遂盡發其貪剋諸事繼先坐
免黨與皆謫戍嶺表軍府肅然癸巳七月六載
考績詔免赴闕甲午以舊疾作賜敕還鄉明年
還休寧里己亥九月卒年六十有三有司以訃

聞贈太子少保謚襄毅遣使諭祭命官治葬事
臨壙復賜祭焉長子敏政進士及第爲翰林學
士號篁墩先生

國朝

提橋字景如河間衛人生有異徵性穎悟弱冠試
弟子員輒冠軍事親承志居喪盡禮先人歿後
有人負其債數百金悉焚券不責償明天啟壬
戌進士仕鄆城商邱皆有惠政擢吏部主事公
清大著端宗有提橋真吏部之語擢太常寺卿
國朝召授刑部右侍郎著有詩經簡正錄行世平生

日恬退戒子弟絕竿牘門望清白稱瀛郡第一
左敬祖字虔孫河間縣人祖圭父鵬程皆以孝義
聞敬祖爲人恢擴大度學有本原舉順治己丑
會試第一官翰林壬辰同考所得皆名士擢通
政使凡有關民生國計及地方利弊水旱災荒
無不條陳剴切復上緩征輸寬徭役旌廉吏禁
奢靡四事爲時所稱晉都察院左副都御史有
所條奏皆奏可又草正心誠意勸學進講諸疏
而疾作不果上乞歸卒于家

上甚惋惜給全祭葬所著有四書易經抄訓等書行

于世

孫際昌號名卿河間人順治己未進士自南陽推
官歷刑科給事時把都公擅國權果于刑戮值
慮囚司寇執法及廷臣皆在凡囚有當矜疑者
把都公欲盡論殺之獨際昌力爭不可又上疏
言之且劾把都專恣得請緩死者甚衆把都公
怒出際昌爲臨洮副使際昌旣出把都恨不已
陝制府其姻也陰屬使陷際昌際昌知之遂告
歸初臨洮舊有以盜繫獄者二十餘人讞未定
多以拷死惟七人僅存際昌疑其寃爲反覆勘

之果得情而七人者脫

戈英字育仲號實齋河間縣人父繼臯隱居有儒
行學者稱爲清軒先生英以順治丁酉舉于鄉
成己亥進士入翰林院康熙初爲御史正色立
朝屢有陳奏其大者請禁提甲陳漕政十害除
弊救民時人比之張公論事後視淮南鹽法有
張鳳陽者大駭也怙惡積久英奏劾其罪會以
憂去反爲鳳陽所誣坐落職已而

朝廷知其枉械鳳陽至京論死復英官平時擅吟咏
出入風雅復不減廣平嫵媚其解組歸也與隣

里耆舊相往來嘯咏自得卒年七十有二子三
懋倫別有傳淳倫康熙癸巳舉人授薊州學政
全倫康熙丁酉舉人以孝友廉介稱于世

賈維英字子才號漢升明殉難知縣太初子也九
歲爲兵所掠復得歸河間其母沈氏撫教之十
四歲爲博士弟子進謁縣令適戚黨有相告訐
者令疑某理枉詢及之維英以數言剖決令驚
曰君他日此席不足爲也順治丁酉舉于鄉旋
授四川筠連令筠連當兵火後邑里蕭條維英
至卽具牛種募民耕墾招集流亡戶版漸充俄

改廣東新會令會山海交錯素稱盜藪而渠魁
梁氏爲尤悍羽翼遍城內外雒英密請憲司謀
而殲焉其黨數百人將悉置于理雒英曰皆我
赤子也力保而宥之後皆爲良民數年擢知山
西岢嵐州州以七月隕霜殺穀適西陲軍興上
官不欲以災告雒英力請乃得賑遇有爲怨家
所誣者罪幾不測雒英爲雪之遷戶部員外郎
復遷刑部郎中以老乞歸甲申歲祲出穀捐賑
當事旌其閭少孤苦舅氏有厚恩于其歸也爲
買腴田百畝以報之

戈懋倫字興三號勉齋侍御英長子也爲人質直
孝友而文少時學有根抵習制舉業屏斥僞體
一歸淳雅年十四爲諸生舉康熙癸酉鄉試壬
午秋

聖祖南巡隨侍御迎

駕顧問良久癸未春

駕復巡幸遣使召侍御及懋倫詣行在

賜御書己丑成進士壬辰

廷試越日引見

上曰此御史戈英子也識子久矣遂授館職懋倫性

坦易內外無城府然斬斬有圭角不隨俗俯仰
年甫踰五十卽以老去言怡然處之歸以德行道
藝訓其子孫優游林下者二十餘載子三鐘
鎮皆舉人錦雍正丁未進士歷任河南浙江縣
令有政聲

張震孫字雲門以康熙庚午舉人任饒州府浮梁
令治內有景德鎮者產磁器江寧回民以商販
至其地輒用迷藥掠去子女鬻于遠方居民咸
切齒訟于官久而莫能白震孫密訪得之盡數
捕逮回黨還欲奪其衆居民以宿忿故擊斃百

人震孫雖坐是罷官而掠賣之弊遂息震孫家
固貧居官不畏權貴尤清慎自矢解組後囊橐
蕭然頗饒守沈贈金始得歸僑居靜邑閉戶謝
塵鞅日以解經爲事邑人受業獲隼者踵起壽
七十二而終

寓賢

古人遊覽名山大川然後發爲文章恣其奇氣
而或以踪跡所經形諸篇什地亦因之而傳倘
所爲相得益彰者歟予讀家公孤鶴征鴻句殆
不勝去國懷鄉之感焉彼其遭遇非時徘徊異

地忠義之情至而哀怨之音多豈復躡履逍遙
娛目騁懷者比哉若夫身見囚辱有死無二時
逢喪亂赴難捐軀雖在羈旅之間皆卓然行其
素志足以起頑而立懦者更非徒咏歌傳世已
也予是以賢之

漢

趙岐桓帝時爲皮氏長聞有家禍因從官舍逃走
之河間變姓氏又轉詣北海著絮巾布袴嘗于
市中販胡飯孫賓碩時年二十餘乘犢車將騎
入市見岐疑其非常人因問之岐具以告賓碩

遂載岐驅歸住車門外先入白母言今日出得
死友在外當入拜乃延岐入椎牛飲酒相娛樂
三日因載著別田舍藏置複壁中後數歲唐衡
及弟皆死岐乃得出賓碩亦從此顯名于東國
仕至豫州刺史初平中賓碩以東方饑荒南客
荊州與平中岐以太僕持節使安慰天下南詣
荊與賓碩遇相對流涕岐爲劉表陳其本末田
是益禮賓碩賓碩死岐爲之行喪

蔡邕靈帝末避罪亡命常至河北經河間鄉亭夜
宿有呼邕者入門曰聞子好琴吾有古曲世所

未曉者當授于子邕起而再拜其人據牀取琴
鼓之音聲淒厲如霰雪之集松柏雞鳴乃去邕
默記其操作清溪五弄見古琴錄

唐

趙驊與李華獨孤及齊名小時勤志學業聞瀛州
李氏自隋以來世爲儒門多積書乃往求爲館
客因得盡讀焉再歲而歸無不記習者遂以文
章著于時見歷代纂聞

凌士燮家本吳也客于河間窮討六籍而于春秋
尤邃爲助教守道不同嘗構蓬室題咏者甚衆